

東
華
續
錄

東華續錄

咸豐八

臣王先謙敬編

臣陶澐宣恭校

三月戊子朔兩江總督陸建瀛奏查覆見辦保甲情形並變通章程一分設總巡公所一慎選牌長更夫一豫備鐘鐙器械一酌定巡更地段一嚴密稽查奸宄一豫籌巡更經費一編設戶口門牌一沿河沿湖需用巡船一地面有犬牙相錯之處各董事會巡一地保從中阻撓准董事稟究報聞○己丑撥浙江漕糧三萬石並捐賑餘米二萬九千七百石有奇抵放缺額俸餉○辛卯清明節上詣奉先殿壽皇殿行禮○壬辰諭內閣廣西賊匪自蟻聚金田負嵎抵抗我師併力定謀摧堅深入屢破賊巢殲其渠首逆匪已畏鋒逃竄必當乘此銳氣前截後追分堵合剿見在該省

兵勇雲集鄰省亦協力兜擒朕睠懷南服亟思一鼓蕩平復命湖南雲南貴州三省再調精兵三千名又添調安徽勁兵一千名選派得力將弁管帶前往足資調遣該大臣李星沅等務當督率文武員弁度地相機分布要害使賊進不敢拒退無所逃其裹脅愚氓亦卽剴切曉諭許令悔罪自首免致玉石俱焚如能縛獻渠魁仍應加之獎勵朕聞該省紳士商民各處團練同仇奮義自必率同士勇合力殲除斷不容釜底遊魂擾我樂土至軍需糧餉已命所司寬爲籌撥源源接濟惟望捷音疊報全境迅就肅清朕必立加懋賞爾臣民其共勉之特此布諭嚴疆咸知朕意○諭軍機大臣等李星沅周天爵向榮奏賊勢披猖官兵不敷策遣一摺李星沅周天爵向榮均經朕特簡授以重任深資倚畀添兵籌餉無不立允所請毫無掣肘之處況金田大股逆匪已經焚毀賊巢連獲

勝仗該大臣等勦辦已屬得手正可乘機兜捕卽各屬報有夥匪亦宜度地相機分派員弁督勦以期全境肅清何以此次奏請特簡總統將軍來粵督辦無論命將遠來必致耽延時日且兵將等一聞另有遣將之諭勢將紛紛觀望設有貽誤罪將誰歸朕於軍旅之事任人勿疑前經疊次訓勉亦可見君臣一體之意卽諸臣意見偶有不同無非因公起見兵貴神速聞不容髮豈可遽思諉卸坐失事機李星沅周天爵向榮俱著嚴行申飭該大臣等務當勦力同心滅此醜類各屬地方賊情應如何調派將弁統領分勦合擊之處朕亦不爲遙制也昨有人奏賀縣知縣鶴年因兵民逃散力不能支以致自縊龍州同知王淑元合家被害武緣縣知縣邵坦吞金自盡除查明業經賜卹外其餘各情仍著該大臣確切查明奏請議卹原片著鈔給閱看將此由四百里各諭令知之○

乙未諭軍機大臣等廣西軍興以來雖疊獲勝仗而賊勢猖獗縱橫皆是見又添調滇黔楚皖精兵前往協剿兵力既厚需餉孔殷設使轉運稽時勦辦必至棘手前有旨飭部於江南江西湖北湖南各省籌撥各款銀兩委員解赴廣西恐部文遞到後各省展轉籌商委員又遷延就道甚或以指撥之款藉詞推諉劃扣抵算往返尤遲朕夙夜焦勞粵土一日不安朕心一日不釋著陸建瀛陸應穀龔裕駱秉章各將歷次部撥軍餉已起解者沿途迅速催趲前行未起解者卽日派委幹練員弁星馳解往各按所撥銀數分起領運務須接踵而至源源接濟其鄰近省分接到欽差大臣李星沅等飛咨撥餉無論何項銀兩一面先行速籌撥解一面具摺奏聞不得以未奉諭旨或未接部文致有遲誤昨諭陸建瀛再行豫籌廣西軍餉見在籌備若干先行奏明所有飭調安徽精兵一

千名著陸建瀛飛檄揀調派員管帶起程中途不得耽延其江西
湖南界連廣東廣西各處所尤當刻刻嚴防不可疏懈贛州南安
各屬先因防堵謹嚴賊匪竄回故廣東將弁得以乘勢夾擊獲有
勝仗惟防兵日久恐生玩泄設爲賊匪偵知不免反撲偷越攻我
不備永州靖州寶慶各屬雖據駱秉章奏稱督防周密該匪等距
楚境漸遠惟粵西徧地瘡痍居民已無可擄掠大兵圍剿既久難
保該匪等不竄赴近鄰爲乘間劫掠之計是該二省堵剿情形必
應隨時嚴飭地方文武加意防維自此次訓諭之後設有粵匪闖
入鄰省邊界不但將守邊文武嚴行治罪並將該省大吏重懲斷
不能倖邀曲宥也將此由四百里各諭令知之○諭廣東匪徒剿
捕尙未淨盡而廣西賊匪勢更猖獗徐廣綬統轄兩省自必通籌
兼顧見撥各省銀兩解赴廣西尙恐有需時日東省毗連更近聲

息相聞儻有迫不及待之需徐廣縉等務必於本省庫款內通融撥解卽係畱支款項亦應權其輕重儘先解往以濟急用見在英德匪徒接捕情形如何其高廉一帶盜匪提督陶煜文見已帶兵馳往剿捕惟西省重兵會剿桂平大夥上游兵力不免單弱節據李星沅等奏稱欽州靈山等處賊匪萬餘將竄上思宣化一帶石城匪徒劉八等被東省擊敗竄至博白之大垌墟人數亦有萬餘陶煜文帶兵趕到如賊匪已乘虛西竄卽親督官兵馳赴西省會同剿辦不必以越境爲嫌總須視同一體合謀併力以期埽殄無遺不致老師糜帑是爲至要將此由四百里諭知徐廣縉葉名琛並諭陶煜文知之○丙申諭軍機大臣等廣西自上年以來土匪滋擾經朕特派李星沅周天爵向榮馳往會剿業經疊獲勝仗並將金田大股賊巢焚毀正可乘機兜捕一律肅清日前該大臣等

請簡總統將軍往粵督辦自係意存諉卸是以降旨嚴行申飭朕夙夜焦思添兵籌餉惟恐羣盜分竄擾及鄰省楚粵之交尤爲緊要特命賽尙阿及巴清德達洪阿馳驛前往湖南廣西交界地方督辦防堵事宜李星沅周天爵向榮等接奉此旨不得以朕特派有人稍存觀望務當督率將弁激勵兵民因地因時協謀攻剿該大臣等統領戎行責無旁貸又有特派重臣爲之聲援兵氣旣揚賊鋒自挫如賽尙阿未到湖南以前業已一鼓蕩平捷音迅報渥膺懋賞寔惟爾諸臣之功儻各持意見不以公事爲重老師糜餉坐失事機亦惟爾諸臣之罪孰得孰失孰利孰害該大臣等自能熟思審處也懍之勉之將此由四百里各諭令知之○命大學士賽尙阿馳往湖南辦理防堵事宜鑲黃旗蒙古都統巴清德鑲白旗滿洲副都統達洪阿隨往協同辦理○命內閣侍讀穆蔭以五

品京堂候補在軍機大臣上學習行走○丁酉尊封 仁宗睿皇

帝 如皇貴妃鈕祜祿氏爲 如皇貴太妃 上詣 壽安宮

如皇貴太妃前行禮○頒大學士賽尙阿欽差大臣關防○調四

川兵一千名赴廣西湖南交界防堵○戊戌命工部尙書阿靈阿

恭辦 昌西陵工程○庚子 上御紫光閣閱侍衛騎射○辛丑

上御撫辰殿陳帟帳步射並閱王大臣侍衛等射○予宋臣李

綱從祀 文廟○賞賽尙阿巴清德達洪阿段匹並從征員弁兵

丁銀○壬寅尊封 宣宗成皇帝 康慈皇貴妃博爾濟吉特氏

爲 康慈皇貴太妃 琳貴妃烏雅氏爲 琳貴太妃 常貴人

赫舍哩氏爲 常嬪 佳貴人郭佳氏爲 佳嬪 彤貴人舒木

魯氏爲 彤嬪 成貴人鈕祜祿氏爲 成嬪 祥貴人鈕祜祿

氏爲 祥嬪 上詣壽康宮 皇貴太妃前行禮○癸卯 上御

撫辰殿閱官員兵丁等射至乙巳皆如之○諭內閣朕因廣西剿匪半載以來尚未埽除淨盡誠恐匪徒滋蔓愈多民生窮蹙益甚特命大學士賽尚阿及都統巴清德副都統達洪阿揀帶官兵馳往防堵楚粵之交地居扼要必得重臣駐紮調度既防竄擾藉作聲援當卽寄諭李星沅周天爵向榮等不得以特派有人稍存觀望仍當督率將士激勵紳民協力殲擒剋期埽蕩在廣西士民聞有此旨定知朝廷眷念邊疆不安宵旰無不奮迅感激志切同仇卽各路調集兵勇亦可知重兵在後益振軍威士氣旣揚賊鋒自挫如賽尚阿等未到以前業已馳報捷音肅清各郡李星沅等奏續行間自當渥膺懋賞賽尚阿等亦可振旅而還以慰朕望第恐中外臣民未喻斯意特用明白宣示俾知朕命將出師不欲我民之久遭蹂躪而又慮徵調過多不免滋累於綏疆靖寇之意固

一日不能釋也將此通諭知之○諭前有旨派大學士賽尙阿等酌帶官兵馳往湖南督辦防堵事宜旋經賽尙阿等酌派征兵二百名隨兵四十名管帶火器並章京司員等不日由京分起前進朕思人數眾多經由驛站易滋騷擾著賽尙阿等飭令隨往文武各員毋得多帶跟役並嚴諭兵役人等沿途行走毋許藉端挑斥訛索從前征兵過境往往包帶客貨多用民夫甚至廣占民房陵辱州縣種種弊端皆所不免朕知賽尙阿向來出差頗能約束此次分起出都已特諭賽尙阿於最後啟程著卽沿途探訪畱心稽查儻有滋擾各弊無論係何人所帶兵役立即截畱按律懲辦並將管束不嚴之員指名參奏毋稍徇隱至各省州縣地方支應兵差例有明文儻有意存見好濫行應付並著賽尙阿一併嚴查隨時奏辦毋負朕諄諄誥誡之意將此通諭知之○諭昨因賽尙阿

出差特旨將內閣侍讀穆蔭開缺以五品京堂候補在軍機大臣
上學習行走穆蔭係軍機章京行走多年尙稱熟悉故令隨同學
習藉資造就茲據給事中蘇廷魁奏稱超擢太驟易啟倖進之門
已不成話並稱俟賽尙阿回京後仍令該員回章京當差黜陟自
下巧爲嘗試尤屬亂道該給事中人甚端方此奏似不出其手但
所言尙無大謬姑置不問夫軍機大臣本爲要地滿漢兼用斷不
應稍有區別朕用人行政一秉大公從無分於滿漢穆蔭人亦中
材朕本欲添派滿洲軍機大臣惟內斷於心親加選擢黜陟大柄
朕自持之非諸臣所可輕議也用是明白宣示使知朕意○命江
蘇淮揚道嚴正基馳往廣西軍營辦理糧臺事務○甲辰李星沅
周天爵向榮奏逆匪自牛排嶺潰竄後盤踞武宣東鄉一帶大股
時出剽掠勢極猖獗二月十七日督兵分路進剿自午至申力戰

數時之久賊匪愈集愈多我軍幾不能支臣天爵揮軍奮勇直前
立於陣前手刃退走閩勇二人親率東勇大呼前進我軍乘勢奮
擊勇氣百倍先後殲斃賊匪數十人賊眾紛紛敗竄雖未大加懲
創然經此攻剿之後賊膽已寒惟有激勵將士迅圖撲滅 上諭
軍機大臣等李星沅等奏分剿賊匪情形各摺片周天爵於進剿
武宣東鄉逆匪時手刃退走閩勇二人親督東勇前進殲斃賊匪
數十人看其精神矍鑠並非老不能軍見既親歷戎行著卽專辦
軍務帶兵督飭俾得殫竭血誠捷音迅奏惟逆匪自牛排嶺潰竄
之後直走武宣一帶距桂林不遠省垣重地尤宜加意防守著該
大臣等體察情形一面兜捕一面嚴防斷不可稍有疏虞至匪徒
乘間而入昨有旨命賽尙阿等帶領官兵前往湖南廣西之交防
堵並添調四川兵三千名飭部另籌軍餉一百萬兩有此聲援賊

必聞而膽落攻勦更易得手所有續調楚皖滇黔官兵四千名本日又由四百里分飭迅速赴粵大兵雲集併力夾攻自不難迅掃機槍肅清各郡該大臣居中調度周天爵向榮謀勇兼施務當同心勦力計出萬全早紓宵旰焦思方不負此重任也再自軍興以來該省輿地並未繪圖貼說呈覽著卽詳細繪一全圖將水陸道里遠近山川險隘與鄰省何處毗連各股賊匪竄踞何處逐一註明迅速呈奏將此由四百里各諭令知之○以勞崇光暫署廣西巡撫

由布政使署

○予廣西陣亡遊擊謝陞恩等祭葬世職○調四川

兵二千名赴廣西湖南交界處所防堵○丙午 上御撫辰殿陳

帝帳步射並閱王大臣侍衛等射○丁未諭軍機大臣等寄諭兩

廣總督徐廣縉等前因江西南贛各屬多與粵省毗連飭令該省地方官嚴密防堵茲據陸應穀奏稱廣東巡撫以首要各犯就擒

咨行江西將防堵弁兵撤回各等語該督等勦辦清遠英德匪徒如已蕝事自應將見在情形先行奏報此次擒獲首要各犯業已咨令江西撤防何以該督等尙未奏到見在該處匪徒是否全就肅清鄰省接壤之區防堵各兵果否應撤著該督等迅將見辦情形詳細奏聞以慰朕念並著悉心體察如尙有餘黨竄擾他處卽行飛咨鄰省一體嚴防無稍疏虞將此由四百里諭令知之○諭陸應穀奏粵東匪徒次第就擒見撤防兵歸伍一摺江西南贛一帶前因堵禦粵匪節經擊退茲據稱該匪屢挫餘黨逃竄邊境肅清並據廣東巡撫以首要各犯就擒咨行江西將防堵弁兵撤回各等語見在廣東清遠英德一帶軍務尙未奏報完竣該省接壤之處恐尙有逃匪隱伏尙須加意巡防著陸應穀察看情形飭屬認真查緝勿使餘匪乘間再有竄擾至該省防禦出力之文武員

升著俟廣東奏報完竣再行奏請將此由四百里諭令知之○成
申命徐繼畲來京陛見以裕泰兼署福建巡撫○己酉河南巡撫
潘鐸奏豫省捻匪最爲地方之害是以嘉慶年間比照回民之例
凡有結夥三人以上者從重科斷立法雖嚴積習難返臣自抵任
後拏獲匪徒姚經年等一百四十三名復飭南汝光道等陸續緝
獲羅馬等四十餘名兩年以來先後拏辦捻匪二百餘名各屬報
案較少嗣後仍當勤加督拏有犯必獲萬不敢有心文飾報聞○
辛亥諭內閣李星沅周天爵奏遵查知縣自盡情形請將堵剿不
力之營員懲辦一摺廣西已革署富賀營都司李慶什於匪徒竄
入賀縣之時但以守城爲詞並未下鄉堵捕至賊匪竄擾里松李
慶什督率把總劉大綱外委勞玉榮等帶兵抵禦復有損傷迫該
縣鶴年情急自縊又不能窮追賊蹤奮力剿洗實屬庸懦無能李

慶什著發往新疆充當苦差劉大綱勞玉榮均著革職發往軍臺效力贖罪前署平樂協副將伊凌阿雖查無畏葸縱賊各情惟身膺專閫於賊匪竄擾未能迅速撲滅實難辭咎著交部議處○諭軍機大臣等李星沅周天爵向榮馳奏進剿武宣逆匪未能得手情形並周天爵瀝陳病狀與向榮會籌勦辦事宜各摺片賊匪滋蔓日久股數既多勢不能旦夕埽殄自宜妥籌戰守以冀奏功前此向榮屢獲勝仗朕固日盼捷書此次進剿武宣賊匪互有勝負秦定三所帶黔兵能將身穿黃衣之大頭目用槍擊斃亦屬奮勇得力該大臣等仍當和衷共濟盡力籌畫務須計出萬全不可再有挫失固不必遽請議處也周天爵身歷行間朕素嘉其勇往是以前旨令其專辦軍務所有巡撫篆務已命勞崇光暫署周天爵舊疾復作朕深以爲念著卽在營善爲調理止須調度有方正不

在親自衝鋒禦侮前命賽尙阿等馳往楚粵之交正爲廣西用兵
熟籌此舉已飭調四川精兵三千名先後馳往協剿其餘鄰近各
省官兵有可酌調之處該大臣等察看情形徑行檄調朕亦不爲
遙制其湖南總兵李伏遊擊成林四川副將劉長清均已諭令帶
兵前往並諭徐廣縉揀選精兵五百名飭往備用賽尙阿等未到
廣西之前該大臣等總當恪遵前旨迅速籌剿不可稍事遷延觀
望其應如何籌守籌戰先堵後剿並度地勢設伏鈔擊之處該大
臣與周天爵向榮熟思審處協力妥辦庶慰朕懷其大黃江賊營
接獲逆書已由軍機大臣呈覽矣將此由五百里各諭令知之○
諭前有旨令廣州滿洲副都統烏蘭泰馳驛前往廣西幫辦軍務
見在正當剿捕喫緊之時著該督等揀選綠營精兵五百名備帶
適用器械如烏蘭泰業已啟行卽遵派得力將弁管帶兼程赴粵

西軍營聽候調遣昨因陸應穀奏稱接據葉名琛咨會撤防該督等何以至今尚未奏到見在清遠英德一帶情形究竟如何著卽詳細馳奏以慰朕懷其高廉一帶匪徒剿辦是否得手著一併奏聞廣西需兵孔亟見已添調滇黔楚蜀等兵前往廣東清遠軍營如已凱撤兵勇似可移往廣西協剿至軍餉一節雖已飭部寬爲撥解尙恐緩不濟急徐廣縉統轄兩省自必通籌兼顧無待朕再三諄諭也將此由五百里各諭令知之○諭前飭湖南省續調精兵一千名見在廣西需兵孔亟著駱秉章迅卽選派星速前進聽候欽差大臣李星沅等調遣並著派綏靖鎮總兵李伏提標左營遊擊成林統帶兼程前往毋稍延緩將此由五百里諭令知之○諭前有旨飭調四川精兵三千名馳赴湖南廣西交界候賽尙阿到日調用茲據李星沅等奏飛咨四川挑兵一千名遴委總兵管

帶並請派督標副將劉長清一同赴粵等語著徐澤醇卽將初次所調川兵一千名飭令劉長清帶往廣西軍營聽候李星沅等調遣其二次續調川兵二千名卽遵前旨選派得力將弁星速馳往楚粵交界處所候賽尙阿調遣該督並將帶兵員名及何日啟程何日出境之處一面由驛奏明一面飛咨欽差大臣賽尙阿及廣西軍營查照毋得稍有遲誤將此由五百里諭令知之○諭廣西勦辦賊匪前已添調各省官兵並飭雲貴各續調精兵一千名諒已選派迅速前往朕聞雲南土守備義勇巴圖魯左大雅前在軍營出入極爲勇往所轄土練亦甚精銳著張亮基察看情形該土弁是否可以遠赴徵調其所管地方是否必須該土弁彈壓如無窒礙之處卽一面奏聞一面飛札飭令酌帶得力土練數百名星速馳赴廣西聽候欽差大臣調遣可也將此由五百里諭令知之

○壬子諭內閣前據御史王之斌奏參陝西白水縣知縣徐良槐
候補知縣江開各款當交琦善詳查具奏其徐良槐刑押詐贓一
案先據張祥河奏參革職嗣據王懿德審結已交刑部議奏矣候
補知縣江開在撫署閱看課卷校對本章雖無與該撫飲酒之事
惟於己酉科派充同考官將別房薦而未中之卷代呈主司求中
實屬故違功令臨潼縣知縣鍾錫瑞將主司未中之卷用藍筆加
以密圈密點亦屬不合江開鍾錫瑞均著交部分別議處至御史
張廷瑞前參該撫張祥河詩酒風流不理公事一節亦經琦善查
明張祥河供京職時詩酒在所時有見在陝撫於一切公事並無
延誤張祥河著毋庸置議惟封疆大吏身膺簡畀自宜整躬率屬
本不得有所偏好致屬員得以揣摩逢迎卽文墨唱和結習未除
亦恐有誤公事清談廢務浮文妨要古所戒也各省大吏其各勵

精圖治專意從公無負朕諄諄訓誡至意○諭廣西勦辦賊匪籌
調兵餉最爲先務除該省陸續動用外前經李星沅等奏請飭部
撥餉八十萬兩見復派大學士賽尚阿爲欽差大臣前往楚粵之
交督辦防勦事宜調兵較多已飭部續撥餉銀一百萬兩星速解
往以濟軍需自可收飽騰之效惟念大兵雲集需用浩繁必應寬
爲儲備源源接濟使後路糧臺毫無支絀則兵心無內顧之憂奮
迅勇往庶期速靖邊圉著再由內務府廣儲司給發內帑銀一百
萬兩作速解赴大營備用朕睠懷南服宵旰焦勞小醜一日不除
粵民一日不靖不惜大發帑金饋餉轉運以殄羣盜而安善良諒
該大臣等定能督飭領兵大員奮力攻勦迅速戡事俾匪黨悉就
殲滅邊陲立見肅清用副朕靖寇綏疆之意○諭軍機大臣等四
川沿江州縣舊存倉穀著徐澤醇分飭各屬迅卽碾動湊足米五

千石由水路運至湖南地方交該省轉送廣西一切費用准其作正開銷如一時碾動不及著卽動項如數採買運往仍將碾動倉穀湊足米五千石豫備隨後撥運毋得設詞藉口有誤軍需將此由五百里諭令知之○調四川兵一千四百名赴湖南聽候調用○癸丑諭內閣周天爵著賞加總督銜會同向榮專辦軍務○禮部奏朝鮮國王李昇以其祖李裊爲其先世戚臣金龜柱等誣陷以死嘉慶辛酉年間該國邪黨獄起曾將伊祖李裊羅入黨案恐內府編輯載有其事懇辨其誣惟查當日欽奉上諭暨會典所載並無李裊之名所有該國黨案既未經載輯將來自無慮流傳該國王以先事被誣備陳枉抑實係爲人後者之至情應照所請許其昭雪從之○以鄒鳴鶴爲廣西巡撫由順天府尹遷○乙卯諭內閣徐廣縉葉名琛奏勦辦靈山縣境匪徒大獲勝仗全股首夥盡

行殲滅一摺覽奏嘉慰逸匪黃大一股自正月擊敗逃竄之後率眾二千餘人由竹山坪竄踞那彭墟經署都司饒成龍指揮兵勇奮力攻擊立將黃大槍斃並轟斃賊匪一百餘名委員陳義等擊斃三百餘名餘匪逃入墟內於墟前排列大礮施放我軍冒煙衝鋒並進搶得礮位轉向內轟並拋擲火礮墟中周圍火起燒死四百餘名外逃各匪復經署遊擊玉山等分兵截殺二百餘名生擒男婦四十五名並將黃大之妻賴氏擒獲此次統計轟擊焚殺賊匪首夥一千五百餘名生擒二百二十三名奪獲大小銅鐵礮八十四位馬八十三匹槍矛刀械無算此股首夥各匪業已剿除殆盡署都司饒成龍身先士卒不避艱險實屬奮勇著以應升之缺卽行升用先換頂帶在事出力文武各員均堪嘉尚著卽據實保奏候朕施恩賜亡兵勇查明咨部議卹其欽州蘇凝三等股及劉

入等匪徒仍飭該處文武不分畛域盡力勦捕以期羣醜殲除迅速藏事○諭徐廣縉葉名琛許乃釗奏南海東莞請分別停試一指據稱南海縣西湖書院生徒因挾知府改斷公項之嫌不遂其欲投遞匿名罷考紅帖經該督諭令舉出主謀餘可免究尙復容隱不發東莞縣因抗糧生員畏罪自戕一案合邑士子輒卽刷印長紅徧貼罷考請將南海縣西湖書院肄業生童並東莞合學暫停考試等語國家設科論秀原期於風淳俗美之地選取才良若士習刁頑不加懲創仍使不率教者得登庠序而與賓興將何以勸良士是以雍正年間諭旨奉有生童以私心之忿借罷考爲挾制卽令停其考試聖訓煌煌於鼓舞人才之中寓變化愧厲之道且罷考罪名綦重士子束身名教尤當守法懷刑廣東近年士氣民情朕方冀其蒸蒸日上若因一二敗類遂致挾制成風是

稂莠間生轉使嘉禾不殖朕甚愧之著將南海縣西湖書院肄業
生童及東莞合學俱暫停考試該督等卽確查主謀罷考及附議
之人分別首從照例懲辦該書院及該學中有端謹老成將首謀
者舉出抑其人悔罪自首或父兄呈出到官旣肯自新仍可量從
寬典其脅制被累之同學經該督等察實奏明卽當許其考試此
朕董教兼施猶是古人郊遂移風之遺意凡屬多士其各懍遵訓
誡無忽○徐廣縉奏廣西賊目張釗卽大頭羊田芳卽大鯉魚侯
志卽捲背狗關鉅卽大蜘蛛等經藩司勞崇光委員查訪准投首
責令殺賊自贖旋經候補知府劉繼祖督率在金田勦捕會匪斃
賊一百餘名大黃江勦捕會匪斃賊二百餘名奪獲礮械火藥多
件二月初三日進勦會匪張釗等皆隨同殺賊初八日火燒大黃
江牛排嶺張釗等復首先施放火箭焚燬賊巢該賊目僉稱求俟

事竣後將所帶夥伴給予路票回籍其不願回籍者賞充壯丁等語臣以張釗等悖逆素著反覆無常未便率行允准致墮詭謀應俟體察情形再行妥籌安插上諭軍機大臣等寄諭欽差大臣李星沅等徐廣縉奏投誠賊目疊次殺賊出力等語似此以毒攻毒若果辦理得宜未始非化盜爲民之法著該大臣等查覈劉繼祖所稟是否確實其所請俟事竣後將所帶夥伴給予路票回籍及不願回籍者賞充壯丁之處徐廣縉議駁甚是將來如何安插或擇其可用者畱營差遣亦宜豫爲籌酌勿滋流弊至陶八楊撈家兩匪有無續經投誠殺賊自效並張家祥見在何處隨營效力是否帶勇殺賊尙有微勞均著隨時奏聞此等投首賊目是否可靠全在畱心控馭恩威並用庶不至墮其術中也原片著鈔給閱看將此由四百里諭令知之○是月免黑龍江齊齊哈爾墨爾根

布特哈四處因災借給未完糧銀盛京遼陽錦州等六府州縣積欠銀米貸湖南武陵等七縣修築隄垸銀湖北湖南五衛幫丁運費造費銀

夏四月丁巳朔享太廟○以山西代文水等六州縣糧價增昂命發常平倉穀平糶○戊午諭軍機大臣等朕命賽尙阿督帶官兵前往湖南防堵原因李星沅等奏懇專派總統期於事權歸一該大臣行抵楚粵之交著卽馳赴廣西軍營接辦軍務並傳知李星沅馳回湖南會同駱秉章辦理防堵事宜前頒給李星沅欽差大臣關防卽由驛遞繳回可也將此諭令知之○俄羅斯請於喀什噶爾通商上不許命奕山於會議時妥慎辦理○己未命戶部左侍郎舒興阿在軍機大臣上行走○庚申上御乾清門聽政自是以爲常○撥江蘇長洲無錫二縣正耗米五千七百八十

石有奇並隨撥米石協濟蘇松等屬幫丁行月等米○壬戌李星沅周天爵向榮奏賀縣另股賊匪由開建懷集竄踞里松徐廣縉選派督標參將左所等會同廣西官兵進剿三月初五日從里松至半路墟四面界地方與賊接仗開礮轟擊賊退回里松我兵奮勇前進奪蟹家坪駐紮賊匪來撲拒擊兩時斃賊百餘人乘勝追擊賊分股包鈔兵壯亦分投堵截追至里松墟口又斃賊七十餘人左右忽出伏賊兩股放火圍燒該將弁等率兵力戰至日暮不少退卻副將齋清阿參將左所護都司千總郭維彪守備劉恩錫千總侯建祈把總梁興富邱先源外委郭安同時陣亡該逆詭詐異常屢次設伏致挫我師非出奇兵不能制勝惟有隨時偵探賊蹤臨陣格外嚴密以防墮其奸計至陸川縣一帶各股土匪見飭地方文武分路防剿不使凌十八及劉八等股與武宣賀縣大股

逆匪會合致成蔓延 上諭軍機大臣等李星沅周天爵向榮奏

會剿賀縣賊匪將備遇伏陣亡並續調黔兵會剿各一摺另片奏
分剿陸川縣等處賊匪情形續請籌撥軍餉各等語覽奏實深焦
灼此次進剿賀縣匪徒我兵奮勇爭先乘勝前進擊斃賊匪不少
乃因左右另出賊匪四圍放火以致我兵失利將備陣亡用兵之
道謀定後動必須豫爲布置籌畫萬全後路接應之兵尤爲緊要
當賊匪設伏圍裹之時設後路有兵層層接應乘勢殄滅安知不
轉敗爲功朕屢次諭令李星沅等嚴密布置勿墮奸計乃竟屢次
遇伏致挫我師未見我兵壯設伏誘賊及至賊黨飽颺而去乃始
調兵尾追搪塞了事於事何濟該大臣等既知賊匪詭詐異常非
奇兵不能破何尙毫無成算一至於此嗣後必須偵探賊情知其
出沒蹤迹每遇督兵進剿之際務格外嚴密防其奸詭毋得再有

疏虞李星沅總統軍務數月以來未見所辦何事見派賽尙阿督兵接應尤不准稍形觀望致干咎戾該大臣等縱不自愛其如吾民塗炭何言之至此憤悶殊深至陸川縣一帶各股賊匪尤當嚴飭該文武督帶兵勇分投防剿勿令凌十八及劉八等與武宣賀縣大股逆匪合而爲一總兵惠慶德亮均係專闖大員統兵督剿責無旁貸見在帶兵防剿何處來摺均未敘及能否得力據實具奏該省節次請調官兵不下一萬數千名兩次由部撥餉一百八十萬昨又特發內帑一百萬是添兵增餉不爲不多該大臣等宜如何合力同心謀勇兼施以期迅速肅事用副朕望耶將此由五百里諭令知之○諭寄諭兩廣總督徐廣縉據李星沅等馳奏進剿賀縣匪徒官兵遇伏致有挫衄並瀝陳兵餉支絀情形廣西賊氛日熾節經調兵籌餉以期源源接濟惟各省道路遠近不一猶

恐緩不濟急見在廣東勦辦匪徒已經得手該督務卽遵照前旨
激勵將弁移得勝之師迅赴廣西會同勦辦並著曉諭該省士紳
如有捐貲募勇隨往勦捕出力者朕必優加獎敘該督所派副將
齋清阿參將左忻等前赴賀縣協勦均能奮勇殺賊爲國捐軀實
堪憫惻已降旨加等賜卹可見東省兵壯無遷延退縮惡習仍須
鼓勵士心再接再厲勿令賊勢蔓延句結至廣西軍餉前經兩次
飭部撥銀一百八十萬兩昨又特發內帑銀一百萬兩但長途護
解遲速難定廣東接壤西省如廣西見有急需著該督仍遵節次
諭旨無論何款何項務卽迅籌解往毋致稍失事機該督職任兼
圻責無旁貸總當事兼權並計俾兩粵早就肅清以慰朕塵見
在賽尙阿等已於四月初旬先後出都所有東西兩省會勦情形
該督一面奏聞一面沿途飛咨該大臣查照可也將此由五百里

諭令知之○熱河副總管毓祺奏 綏成殿應修等工完竣謹擇
於四月二十一日敬由 澹泊敬誠殿奉移 宣宗成皇帝 聖
容供奉 綏成殿得旨是○予廣西陣亡副將齋清阿等祭葬世
職○調貴州兵一千名馳赴廣西聽候調遣○甲子諭內閣前據
徐廣縉查參廣西巡撫鄭祖琛彌縫粉飾各情當經降旨將鄭祖
琛革職周天爵抵廣西後即將鄭祖琛釀禍原委陳明朕以該革
員身任封疆既不能消患未萌又不能將貽誤之提鎮及文武各
員早行參奏僅予革職回籍不足蔽辜復諭令李星沅周天爵將
該革員如何遷延徇庇之處再行詳查參奏茲據李星沅據實查
明並參覈眾論鄭祖琛於通省文武員弁凡勦捕不力泄沓苟安
者實不能早爲參劾是聞耳無能皆伊一人作俑卽如閔正鳳盛
筠之畏葸延誤鄭祖琛但知見好同官周旋粉飾朕察其設心非

第袒護大員卽屬吏亦不敢參劾似此養癰貽患以致吾民塗炭糜餉勞師僅予罷斥歸田轉得置身事外何以挽頽風而儆有位鄭祖琛著發往新疆效力贖罪以爲封疆大吏玩誤者戒○准截畱廣東解黔餉銀十三萬兩濟廣西軍需○乙丑常雩祀天於

園丘○丙寅諭內閣廣西盜匪橫行民遭塗炭推原禍始總由地方官不得其人撫綏無術而大吏又不能澈清舉劾以致養癰成患業將巡撫鄭祖琛提督閔正鳳革職發遣並疊次飭令李星沅周天爵等確查該省文武各官分別保舉參劾見在廣西通省舉行團練若非慎選牧令使良民得所倚恃何以收眾志成城之效其前此失事及庸懦各員業據李星沅等陸續奏參外所有守禦得力及平日治民出色之員自應秉公奏保以昭激勸見據周天爵特舉林士傳以下十餘人臚列勞績開單具奏見當用人之

際周天爵既破格請予獎勵朕卽不難破格給予恩施各該員承
受朕恩宜如何力圖報稱益加奮勉儻或始勤終怠先後易轍朕
亦惟執法嚴懲至該省劣員仍著確訪款蹟據實糾參毋稍徇庇
姑容庶幾吏肅民安盜風自戢朕實有厚望焉○諭徐廣縉奏賊
目張釗等投誠自效殺賊立功已降旨飭令確查茲復據周天爵
會同向榮奏稱張釗與頭目九人帶領七百水勇於賊距東鄉三
里墟時飭令扼要防江嚴斷接濟賊勢爲之窘急及謀暗攻勒馬
又經候補知府劉繼祖飭張釗等設伏山腰斃賊無數等語是其
歸誠效力確有明徵既能殺賊立功卽不妨寬其既往勵其將來
著照周天爵等所請賞給張釗六品頂帶並賞戴藍翎此後若更
能効力效命不難續加優賞若始勤終怠亦難再邀寬典也○周
天爵奏賊自焚牛排嶺突竄紫金山搶雙髻踞東鄉東西六七十

里複山重嶺水陸俱通省城蓋省南柳州象州各大郡之門戶亦通省安危所繫也賊踞東鄉三里墟糧食雖充而水路爲我先據飭投誠之張釗及頭目九人統領七百人勇前往防江賊無食鹽煙硝欲拌命速戰謀攻黔兵大營潰圍北上是以三月初二日黔兵奮力鏖戰死傷最多初八日聞賊欲出一股攻舊縣墟之江口意欲奪渡而報貴縣之仇再迎凌十八劉八兩股萬餘之賊是水路所關最要陸路兵將不善操舟又不能舟中用礮斷難抵禦臣與提臣向榮鎮臣秦定三熟籌專委張釗與之力鬪知其長於水戰賊必受創初十日張釗果大勝礮斃東岸賊數十人又有被擊粉碎者登山望之伏賊歷歷可指其欲攻秦定三營者布滿山谷是賊欲一股南出以偏師牽動大營而乘虛北上也臣等晝夜水陸梭巡於深林澗谷江畔之地多獲奸細訊供賊又欲明攻舊縣

江口而暗攻勒馬遂飭張釗等備之故張釗以少船守勒馬而以多船藏於山腳嚴陣以待未幾賊果大敗傷斃二十餘人水勇受傷者一人觀見在賊情惟韋政洪秀泉馮雲山楊秀青胡以洗曾三秀頭目數十人而洪秀泉馮雲山爲之最其營皆散處戰亦散布卽敗不至大創皆猾賊之尤者此時兵力不足宜專理坐戰之法力有餘則連營偪進總以大圍收成小圍步步偪緊使之步步縮歸其至計要在驅諸羅淥洞聚殲之若猝然擊之縱獲勝仗必有竄逸逆匪見在暗中四面分竄恐成流賊之勢是一戰之功小致賊四出之罪大也賊情不在速戰而在固守我兵以靜待動以逸待勞庶軍心和而士氣固矣 上諭軍機大臣等周天爵奏急獎有功並陳目前賊情各摺片據奏賊踞東鄉三里墟食鹽煙硝斷絕勢不能不出而速戰以圖潰圍北上其窘迫情狀如見肺肝

見因兵力不敷力持固守之說徐圖進營偏進將各股賊匪驅入羅淶崗然後聚而殲之周天爵親歷行間所見自有把握惟賊情狡獪務當嚴飭我兵防堵周而設百密而一疏致令突圍竄逸與凌十八劉八合謀則剿捕更爲棘手矣張釗投誠立功見已俯准所請給予優賞此輩性情不定設有游移反覆關繫匪輕該大臣等先當示之以誠令無疑懼使脅從之眾悔罪來歸亦以賊制賊之一法至田芳投誠之後有無立功之處其餘頭目能否同心效命均著確查隨時奏聞所請調取遣軍流犯協剿一節向來辦理軍務兼用遣勇亦取其剽悍性成於衝鋒破陣可期得力但須善爲駕馭勿令別滋事端其周濤章允升二人既據力爲申辯諒能用其所長軍旅之事亦難盡選全材也至所保紳民單內各職員究係何官何職且有未聲明籍貫者著查明具奏前次賀縣剿匪

遇伏之後賊勢如何是否再有接仗見在鄰省會籌協剿情形如何著一併覆奏以慰廑注賊首韋政洪秀泉馮雲山楊秀青胡一洸曾三秀等既訪得確實知其習教伎倆卽當設法懸賞購緝使賊黨自猜攻剿更易得手該大臣等總宜相機籌辦毋令日久勾結再致蔓延爲要將此由四百里各諭令知之○己巳諭內閣前據李星沅等奏會剿賀縣賊匪將備遇伏陣亡業經降旨將副將齋清阿等加等賜卹茲據徐廣縉葉名琛馳奏賀縣剿賊情形廣西桂平梧鬱道林士傳經李星沅派令督帶兵勇會剿乃逗遛榕津地方並未入賀縣境內又於進剿時撤退壯勇四百餘名以致孤軍無援深入被困等語此次廣東將弁等奮勇越境追賊若使廣西官兵接應得力何至墮賊奸計該道奉札督辦遷延貽誤咎無可辭林士傳著交部嚴加議處署賀縣知縣甯域署廣甯縣知

縣程兆桂或未能臨時偵探或不能先事撲除致令賊匪竄擾均難辭咎除甯域先已降旨革職外程兆桂著交部議處廣東肇慶府知府蔡振武於所屬地方匪徒滋擾籌勦無方著一併交部議處○諭軍機大臣等前據李星沅等奏會勦賀縣賊匪將備遇伏陣亡情形朕卽以設使後路有兵層層接應何至屢挫我師責其不能設奇制勝毫無成算茲據徐廣縉葉名琛奏稱此役先勝後敗實由林士傳牽掣貽誤已明降諭旨將林士傳嚴加議處矣惟昨據周天爵保奏人員已在賀縣失事之後何以尙將林士傳列入單首粵西軍務前曾諭令彼此互相知照以歸畫一李星沅周天爵等前奏摺尾俱彼此會銜何以署賀縣知縣甯域前經李星沅等奏參革職徐廣縉此次仍未敘及僅請交部議處甯域旣將林士傳撤兵一節稟知總督何以李星沅等摺內並未據稟奏參

種種歧異殊不可解著賽尙阿到軍營後確查林士傳是否官聲
素好賀縣失事情形是否係林士傳逗畱所致甯城所稟該道撤
回壯勇四百餘名是否屬實抑係探知參革設詞誣罪務須分別
查明據實具奏徐廣縉等原摺著鈔給閱看將此諭令知之○免
浙江出征官兵未完借裝銀○庚午諭內閣戶部奏山東省上年
因災緩徵錢糧分別請旨豁免等語所有山東省道光三十年錢
糧因災緩至該年麥秋後啟徵者除已完銀兩應令查明確數據
實造報外其餘未完銀兩著一併加恩豁免至各省如有因災緩
徵錢糧與山東事同一律者均著照此辦理以歸畫一○諭李星
沅周天爵奏查參總兵道府並特參廢弛之知府一摺廣西右江
鎮總兵惠慶右江道慶吉於賊匪滋擾時株守偏隅均未能運謀
設策潯州府知府顧元凱公事不能振作俱著革職仍畱軍營效

力署桂林府知府鎮安府知府廉良澤聲名平常不協輿論著革職永不敘用○諭軍機大臣等李星沅奏卽日親往武宣會籌剿辦一摺又據李星沅周天爵向榮片奏督剿賀縣等處賊匪情形等語武宣大股逆匪既據探明欲分三路逃竄武宣與象州唇齒相依爲全局筭鍵全在該大臣相度地勢調度得宜李星沅見由象州至武宣與周天爵向榮悉心商榷務當探明賊蹤將由何處衝突卽先行扼要布置設奇制勝該大臣等是否合兵一處抑須分路堵剿總宜聲援相應籌畫萬全至後路接應之兵尤關緊要前日賀縣一役卽其前車之鑒所稱紫荊山一帶僅飭桂平平南兩縣帶同壯練巡防未免過形單弱仍當酌量添調兵勇嚴密分布以堵奔竄之路毋再疏虞見在賀縣剿匪與廣東湖南會辦仍應添派總兵大員前往督剿其凌十八劉八各股疊經地方文武

紳練追勦卽著嚴飭各路兵勇相機兜截防其竄逸勿使各股合而爲一至官兵與壯勇同隊擊賊意氣之間難免兩不相下惟在督帶大員駕馭有方使之甘苦適均尤須賞罰秉公自可令其感畏用命再象州舉人韋任元等及博白紳士朱德華朱德缺王汝諧等均於上年募勇殺賊何以未獲議敘貴縣宣化等處屢獲要犯之團練何人何名著一併查明分別保奏以昭激勸將此由四百里諭令知之○江蘇巡撫楊文定奏到任日期得旨江蘇漕務年來疲玩已極汝須力求整頓任怨任勞不可稍示慈柔如再有大戶把持據實具奏朕必從重治罪以儆刁風朕言之必行莫視爲具文也懷之此旨著與武棠同閱○辛未廣東英德股匪平予徐廣縉葉名琛優敘賞總兵官崑壽花翎○撥江南鹽關銀六十萬兩赴廣西大營○癸酉署正白旗滿洲副都統敬徵卒贈一品

銜予祭葬如尙書例諡文愨○免直隸節年民欠額賦並出借未完銀穀○甲戌諭軍機大臣等徐澤醇奏川省撥解廣西軍餉請加意防護等語部撥各省及特發內庫銀兩陸續解往廣西見在楚粵之交尤應慎重接遞著駱秉章於各省委員管帶餉銀到境除照例僉派兵役護解外添派武員酌帶官兵逐站防護入廣西境後並著李星沅等飭派弁兵接替保護務期妥速運解毋稍疏失其賀縣匪徒自三月十五日竄至慈樂墟後經三省官兵合剿自必迅就撲滅湖南提督余萬清見駐江華防堵所調兵勇多至三四千名務遵節降諭旨加意嚴防毋任匪徒竄入儻廣西賊勢猖獗竄近楚境卽應迎頭進剿勿以越界爲嫌至安徽四川官兵陸續調赴廣西取道湖南應妥爲彈壓勿令滋擾將此由四百里諭令知之○丙子李星沅周天爵向榮奏廣西賊匪有大勝堂潘

大等於三月初二日率眾由果化竄至土上林墟經百色廳孫蒙雲南都司李廷楷等帶領兵勇分投勦捕斃賊二百餘名生擒三十七名斬獲首匪蘇晚潘六等首級五顆奪獲礮械多件初三日進攻斃賊三百餘名生擒九名該匪退踞土上林墟自初七至十一日我兵疊次分投進攻連獲勝仗將匪首潘大礮斃並疊殲賊夥八百餘名生擒數名受傷落水者無算又奏廣西另股會匪凌十八等由廣東石城縣竄出圍攻鬱林州城經雲南臨元鎮總兵李能臣等統帶滇兵會同署臬司楊彤如督率鬱林直隸州知州顧諧庚分帶各路兵勇於三月二十五二十七二十九等日三次分路進攻奮勇勦每次殲匪數百名顧諧庚親督練丁生擒僞先鋒黃三黃八二名署提標守備秦如虎策馬當先衝入賊隊連砍數賊被匪用竹槍戳傷胸膛鳥槍打傷右股仍負痛力追復殺

數賊經兵勇趕到將此股賊匪盡行殺斃其另股匪徒用藤牌遮護衝突經按察司經歷鄭泉所帶之東勇等亦滾舞藤牌衝入賊隊與滇兵夾擊斃賊無數復將坐轎指揮之僞軍師王晚砍斃仍當督飭各軍乘勝進攻將首匪凌十八及陳十六賴八剋期擒獲上諭內閣此股會匪抗拒官兵疊獲勝仗賊鋒已挫亟應乘勢擣毀賊巢將首匪凌十八及陳十六賴八等悉數殲除秦如虎驍銳善戰忠勇勃發著賞戴花翎卽以都司升用先換頂帶其殺斃王晚之東勇並出力員弁均著查明覈實保奏○諭李星沅周天爵向榮馳奏進剿上林墟賊匪殲擒殆盡一摺此次疊獲勝仗文武各員均屬奮勇可嘉張國樑謝錫祥於悔罪投誠之後既能隨同官弁殺賊立功卽可寬其既往予以自新張國樑著以千總補用並賞戴藍翎謝錫祥著賞給六品頂帶以觀後效○諭李星沅

周天爵向榮奏賊匪擁入西林縣城請將失守城池文武及該管知府一併革職拏問一摺凌雲縣河口首匪陳三帶領匪黨至西林滋擾不過數百餘人該縣文武儻能先事嚴防協力迎捕據城固守何至被賊擁入衙署搶掠一空如入無人之境該署府督帶壯練自郡啟程何以聞有攻襲郡城浮言竟不查實卽行折回西林縣知縣文滋盛典史邵治護理上林營都司馬正標千總朱雲把總楊錦魁並泗城府知府徐培均著革職拏問交李星沅等嚴訊確查如城守文武各員中實有見賊逃避情事著卽一面正法一面奏聞以肅軍威而昭國憲至己革總兵惠慶當時是否託名防堵潘大股匪並不帶兵赴剿致誤事機並著嚴查具奏○諭軍機大臣等據李星沅周天爵向榮奏堵剿懷集陸川各匪情形等語賊匪溫大貨五一股前由賀縣竄至懷縣之慈樂墟復竄至梁

村盤踞膽敢直撲縣城雖經該署縣李萱嚴防迎擊並經副將阿爾經阿等帶兵馳抵該處會剿而該匪等已分爲兩股潛由陸路逃竄此股賊匪前經徐廣縉等奏稱探知由里松竄赴羅石擬分兩股由桂嶺大凝分逃其懷集之冷坑岡坪梁村馬凝一帶當其衝已飭遊擊強其修等督帶清遠行營撤回弁兵飭往籌防計勞崇光由梧州帶兵馳往督剿即可與東省文武合力夾擊俾該匪不得東奔西突自可迅速殲擒其滋擾陸川縣之劉八一股據稱經各村團練先後斃匪多名復斃賊首該署縣張琳堵禦尙嚴署臬司楊彤如與總兵李能臣等此時如已將鬱林凌十八股匪剿滅淨盡定可移兵駐剿惟該匪等退回烏石復由雞籠卡一帶竄去該處毗連博白之三灘冷潭前博白縣游長齡見已降旨補授肇慶府知府該員剿辦賊匪激勵團練素得民心如一時未便更

易生手卽著畱於該處俟勦辦事竣再赴升任所有肇慶府一缺見當防堵喫緊之際卽著徐廣縉等派委明幹之員署理至凌十八匪黨如敢竄往武宣與金田會匪合夥必須設法堵截切不可令其勾結其武宣東鄉大股逆匪官兵連次接仗尙未得手見在如何籌畫勦辦朕心實深懸念想不至坐待統帥前往虛延時日也至烏蘭泰早報起程於何日到粵西軍營是否亦在武宣會辦左江鎮總兵德亮見帶兵在何處勦賊是否得力均著附報具奏將此由五百里各諭令知之○予廣西殉難知縣鶴年祭葬世職○庚辰諭內閣戶部奏請飭定軍需章程等語廣西各股盜匪滋擾疊經頒發內帑並撥各省銀兩以濟軍需兼令附近廣西各省添防設備見在辦理糧餉款項紛繁必須豫定章程方足以昭覈實而杜浮濫著該部卽將軍需則例頒給廣西等省按例載先將

安設臺站地名里數及大營何日改移臺站何日裁併繪圖造冊
奏明交部並著廣西巡撫暨總理糧臺各員鄰近廣西各督撫等
通盤籌畫迅卽遵照定例妥議章程酌議各項支發銀數奏明畫
一辦理其例無明文款項一概不得濫支以重帑項○諭前派大
學士賽尙阿爲欽差大臣督帶官兵前往湖南防堵原因李星沅
等奏懇專派總統期於事權歸一本月初旬賽尙阿啟程以前卽
經密交諭旨令卽馳赴廣西軍營接辦軍務並令傳知李星沅馳
赴湖南會辦防堵事宜本日據李星沅奏稱移駐武宣舊疾增劇
見在醫治已將欽差大臣關防暫交周天爵等語賽尙阿見已在
途著卽馳赴廣西接辦欽差大臣事務並傳知鄒鳴鶴兼程前赴
巡撫新任李星沅著卽回籍養病毋庸畱駐軍營所有前項頒給
李星沅欽差大臣關防著暫交周天爵收存俟賽尙阿到日卽由

驛遞繳還周天爵於賽尙阿未到以前通省軍務仍著會同暫署
巡撫勞崇光提督向榮悉心籌畫相機妥辦勿稍延誤其湖南防
堵事宜駱秉章余萬清見在督辦毋得稍有疏懈○諡軍機大臣
等據李星沅等奏鬱林州會匪被擊潛逃州圍已解一摺會匪凌
十八等圍攻鬱林州城兩旬有餘先經總兵李能臣署臬司楊彤
如等督兵進剿大獲勝仗當降旨飭令乘勢攻擊務將凌十八陳
十六賴八各首匪悉數殲擒以除醜類茲據奏稱該文武員弁分
路進攻逼近賊巢風雨大作該匪冒雨分股潛遁等語此股會匪
雖經懲創而首惡稽誅餘黨諒亦甚夥見既竄至距城十里之頭
塘地方該處切近陸川博白各縣境務飭各該文武實力堵剿不
可更令竄擾並著周天爵責成李能臣楊彤如等將該股會匪乘
其潰散之餘賊膽已怯激勵軍士併力兜剿趁機接捕斷不可任

該犯等與武宣大股會匪勾結致令餘燼復然也該州被圍日久居民蹂躪不堪著周天爵勞崇光等迅飭查明加意撫綏見在武宣一帶如何籌辦之處並著隨時奏明以慰朕念將此由五百里各諭令知之○護安徽巡撫蔣文慶奏保甲情形酌議團練章程一派雇團丁以資保衛一豫籌經費以期經久一擇人經理以專責成一酌分段落以便呼應一設立公所司號召一輪班防警以均勞逸一置給器械以資捍禦一示給獎賞以杜擾害一造換冊籍以嚴稽覈一隨時訓練以明大義又酌議巡江事宜一嚴查匪船以清盜窩一嚴防港汊以絕盜蹤一分股稽查以專責成一添設棚卡以期周密報聞○壬午諭內閣曾國藩條陳一摺朕詳加披覽意在陳善責難豫防流弊雖迂腐欠通言尙可取朕自卽位以來凡大小臣工章奏於國計民生用人行政諸大端有所裨

補者無不立見施行卽敷陳理道有益身心者均畱置左右用備
省覽其或窒礙難行亦有駁斥者亦有明白宣示者朕欲求獻納
之實非沽納諫之名豈得以毋庸議三字付之不論也所奏除廣
西地利兵機已令查辦外餘或語涉過激未能持平或僅見偏端
拘執太甚念其志在進言朕亦不加責斥至所論人君一念自矜
必至喜諛惡直等語頗爲切要自惟藐躬德薄夙夜孜孜時存檢
身不及之戒或因一二過當之言遂不量加節取是卽驕矜之萌
朕深思爲君之難諸臣亦當思爲臣之不易交相咨儆庶坐言起
行國家可收實效也○諭軍機大臣等本日據留國藩奏廣西軍
務宜酌度地方慎重軍需等語著賽尙阿於行抵軍營時酌量情
形是否應分三路進兵其安設糧臺究於何處爲便均須斟酌盡
善妥爲辦理原奏著節鈔給與閱看將此由四百里諭令知之○

諭寄諭雲貴總督吳文鎔等翁同書奏貴州盜風日熾鎮遠黎平
二府爲尤甚黎平距省最遠更易藏奸該郡匪徒共有三種一曰
土匪一曰苗匪一曰外來游匪數百爲羣聚散無定搶劫拒捕民
不聊生又有銅仁府萬山廠徒散而爲匪牛皮大箐之旁亦有苗
匪四出剽掠似此盜賊充斥若不嚴行懲治必致釀成巨案見在
廣西剿賊未竣前據喬用遷奏拏獲匪徒卽由廣西竄入儋查辦
稍疏致與鄰省勾結尤爲可慮著該督撫嚴飭該地方官上緊緝
捕其已報各案固不可稍涉寬縱其未報者尤宜密訪嚴查前於
正月間該撫奏稱黎平府報獲審辦著名巨匪郭濟民是否尙有
其人務宜及早訪拏淨絕根株以杜後患儻因循粉飾釀成事端
朕惟該督撫是問懷之原摺著鈔給閱看將此由四百里各諭令
知之○癸未諭內閣前任兩江總督李星沅由翰林敷歷外任疊

蒙 皇考簡畀封圻因勦辦雲南漢回軍務 恩加太子太保銜
賞戴花翎旋令總制兩江嗣以病請假回籍上年來京召對朕見
其精神強固年力方盛足資倚畀因其母老多病俯准所請俾令
歸里侍養冬間廣西盜匪滋事特授爲欽差大臣領給關防令其
馳赴該省勦辦歷據馳奏籌畫軍情均能周妥昨由柳州力疾進
駐武宣正擬親督將士埽除羣醜乃甫報病勢增劇卽聞溘逝披
覽遺疏詞意憂憤悼惜殊深念其不遑將母沒於王事尤堪憫惻
李星沅著加恩照總督例賜卹任內一切處分悉予開復應得卹
典該衙門察例具奏並賞給銀五百兩經理喪事卽著湖南巡撫
於藩庫內支給頒去人蔭十兩交駱秉章一併派員致送其家賞
給伊母俸資調養李星沅之次子李概三子廩生李桓均著俟服
闋後交吏部帶領引見候朕施恩尋予祭葬諡文恭○周天爵向

榮烏蘭奏賊踞東鄉之村頭村爲韋逆大淵藪其地西至東嶺
三里墟有三十餘里賊以東嶺三里墟爲東鄉之門戶以台村
湖之淤田爲關欄以山鞍嶺爲域限以莫村一帶十餘村爲埋伏
之所精銳大半悉萃於此西窺武宣則由涼亭新路口而西北窺
象州則由二塘墟大林小林而北其間山徑崎嶇最易竄逸已飭
各營兵丁練勇分番巡緝自二月二十二日至今計擒大小頭目
與留經打仗之賊共二十二人江路自武宣至桂林之碧灘百餘
里凡渡口十餘處派水勇七百名福勇三百五十名晝夜梭巡亦
罕獲大頭目僞右先鋒湯亞才訊供凌遲處死至於見仗堵斃者
則舊縣勒馬滑石平冲洞尾崇響碧灘等處皆因爭渡截殺斃
淹溺者數百人刻下賊情甚窘所急需者食鹽臣等已差人售入
毒鹽逆賊日有斃者各營兵勇受瘴病斃亦復不少俟滇黔兵到

休息一二日訂期將防堵兵勇一律挑選進哨一攻東鄉一攻東嶺一帶賊巢可以一鼓偪入羅淥峒烏蘭泰又奏臣四月初三日抵武宣軍營訪詢賊情土匪十餘股皆烏合之眾凌十八會匪一股亦類土匪惟武宣東鄉會匪立有偽王偽官名目蓄髮易服眾至萬餘實廣西腹心之患若將此股殲除各股土匪不難次第撲滅見在兵力尙單會匪既兇勇死鬪且伎倆詭譎止可相持嚴堵以待續調之兵再酌量進剿武宣東鄉地勢四圍皆山西臨右江中間平陽不過五六十里間有小山重嶺其內大小村墟共六十餘處東鄉一帶均被賊匪占踞四面隘口早經署撫臣周天爵提臣向榮分撥兵勇扼要堵截俟兵力稍齊即可分路進剿上諭軍機大臣等周天爵奏東鄉賊情烏蘭泰奏馳抵軍營及辦理情形各摺片見在李星沅病故著周天爵暫署欽差大臣卽用廣西

巡撫印信其欽差大臣關防仍遵前旨收存俟賽尙阿到軍營後
由驛繳回該匪以東鄉爲淵鼓東嶺三里墟爲門戶經周天爵等
督飭各營兵丁練勇將四面隘口扼要堵截分番巡緝並派候補
知府劉繼祖於江路各渡口統領水勇等晝夜梭巡疊次擊獲大
小頭目又獲戕官之大頭目僞右先鋒湯亞才訊供正法賊情窘
迫計可聚族而殲周天爵殫竭血誠向榮奮勇出眾烏蘭泰初抵
軍營正可會商剿辦此時自以設偵選鋒嚴防賊匪竄逸爲要務
卽設法斷其鹽米接濟俾食用無資進攻更易得力兵貴神速亦
應持重如兵力不敷斷不可深入重地致墮奸計周天爵等身歷
戎行相機籌辦自必計出萬全也勞崇光暫署巡撫著仍用藩司
印信賽尙阿未到任以前所有陳奏事件著周天爵會同勞崇光
向榮烏蘭泰連銜具奏以歸畫一將此由五百里各諭令知之○

周天爵奏欽差大臣李星沅病故並自陳舊病已愈得旨見已命汝暫署欽差大臣矣須妥爲調度勿失機宜朕聞汝鼻衄實深眷念雖精神復完尤應善自調攝切勿過形激憤以體朕懷○甲申諭軍機大臣等昨據周天爵奏武宣東鄉逆匪經官兵分路堵截勢漸窘迫一俟滇黔續調兵到剋期進剿一鼓偪入羅淥崗聚而殲旃又據烏蘭泰奏會匪狡悍異常兵力尙單再戰無益止可相持嚴堵待續調之兵各等語當降旨飭令持重嚴守勿墮奸計會匪併命抗拒其黨甚堅與各股匪盜情形不同武宣兵力稍形單弱自應以守爲戰遏其竄逸惟續調官兵據各省節次奏報啟程旣已陸續抵粵儻因接濟斷絕匪勢窮蹙將圖突圍分竄鋌險而走生力官兵續到大營士氣益奮兵機間不容髮亦不可坐失機宜賽尙阿未到以前周天爵暫統軍務向榮烏蘭泰相助爲理自

必同心協力三人直如一人斷不至各執己見未能計出萬全卽或稍有挫折斷不可互相諉過軍營所集兵勇雖有省分風氣之不同其爲干城禦侮則一師克在和古訓昭垂總期善爲駕馭固不可輕率僨事亦慎勿遲延貽誤以慰朕望將此由四百里諭令知之○兩廣總督徐廣縉等奏候補知府陳瑞芝管帶潮勇赴廣西會剿得旨諸務妥協實屬認真○以勦辦廣東欽州股匪出力予提督陶煜文等優敘○免江蘇出征兵丁未完備裝銀○乙酉兩江總督陸建瀛奏江蘇米價平減無須閩商運米接濟請停閩商裝載豆石出口之例報聞○丙戌廣西巡撫鄒鳴鶴奏報籌剿情形得旨務期實力奉行不可被屬員蒙混盜風滋熾必應先剿後撫而粵西吏治亦資爾整飭振刷精神竭忠盡力勉爲之○貸江甯駐防八旗及督漕河標各營兵丁折餉銀○命春熙畱京以

三四品京堂候補以崇綸爲雲南按察使

由直隸永定河道遷

○是月緩山

西右玉等十州縣買補動缺穀石蠲免吉林三姓地方因災緩徵銀米並熱河平泉州豐甯縣民欠地糧旗租銀